

BAB 1: PENGENALAN

1.0 Pengenalan

Bab ini membicarakan tentang objektif kajian, soalan kajian, kepentingan kajian, batasan kajian, latar belakang kajian, sejarah Bugis di Tanah Melayu, penempatan orang Bugis di Malaysia, kegiatan sosio-ekonomi, politik, agama serta adat dan Budaya orang Bugis. Di samping itu, sejarah Kampung Parit Keroma yang merupakan lokasi penempatan komuniti Bugis di dalam kajian ini turut dibincangkan dalam bab ini.

1.1 Objektif Kajian

Semua bangsa atau komuniti dalam sesebuah negara atau tempat di dunia ini mempunyai bahasa ibunda mereka sendiri. Namun begitu, sejauh mana mereka masih menggunakan bahasa ibunda mereka sepenuhnya dalam kehidupan seharian mereka yang semakin mencabar dalam pelbagai aspek boleh menimbulkan persoalan. Ini adalah disebabkan peranan globalisasi misalnya dapat mengubah tanggapan ini. Kesannya adalah berlakunya perubahan dan pengalihan kepada bahasa lain yang lebih dominan dalam konteks semasa. Di samping itu juga cara sebutan dalam sesuatu bahasa ibunda juga boleh berubah atau dipengaruhi oleh bahasa lain akibat dari pertembungan harian dalam pelbagai domain.

Bertitik tolak dari perkara tersebut satu kajian boleh dijalankan untuk melihat apa yang terjadi dalam satu komuniti yang dipilih. Sehubungan dengan itu komuniti minoriti Bugis di Malaysia telah dipilih sebagai sampel kajian. Komuniti yang dipilih adalah masyarakat Bugis yang tinggal di Kg. Parit Keroma, Ayer Baloi (KPK), Pontian Johor. Komuniti ini dipilih kerana peranan mereka sebagai komuniti minoriti yang mempunyai bahasa ibunda

tersendiri iaitu bahasa Bugis dan berada dalam satu kelompok masyarakat yang besar yang mempunyai pelbagai etnik dan bahasa. Kajian ini diharap dapat memperlihatkan sejauh mana penutur Bugis ini menggunakan bahasa ibunda mereka dalam kehidupan seharian mereka.

Sehubungan dengan itu 2 objektif kajian telah dikenal pasti, iaitu:

- 1) Untuk mengenal pasti pemilihan bahasa oleh komuniti Bugis di Kg. Parit Keroma, Ayer Baloi, Pontian, Johor dalam domain rumah, domain intra komuniti dan domain kerja.
- 2) Untuk membandingkan penggunaan bahasa oleh komuniti yang sama tetapi telah berpindah atau berhijrah dan menetap di Kuala Lumpur dalam tiga domain yang sama.

Bagi memenuhi objektif-objektif tersebut, 2 soalan kajian telah dihasilkan dan akan dibincangkan seterusnya.

1.2 Soalan Kajian

Dalam era globalisasi ini bahasa memainkan peranan penting sebagai alat perhubungan atau komunikasi. Keperluan terhadap bahasa kebangsaan, rasmi, antara bangsa atau bahasa ketiga menyebabkan kita tidak mengambil kira atau mengambil perhatian tentang bahasa-bahasa minoriti yang terdapat di negara kita. Oleh itu, pengkaji ingin melihat sejauh mana

bahasa minoriti etnik Bugis iaitu bahasa Bugis masih digunakan berdasarkan soalan-soalan kajian berikut:

- 1) Apakah bahasa yang dipilih oleh komuniti Bugis di Kg. Parit Keroma, Ayer Baloi, Pontian, Johor dalam domain rumah, domain intra-komuniti dan domain kerja?
- 2) Apakah bahasa yang dipilih oleh komuniti Bugis dari KPK yang telah berpindah dan menetap di Kuala Lumpur dalam domain rumah, domain intra-komuniti dan domain kerja?

Kedua-dua persoalan ini dijangkakan dapat membantu dan memberi gambaran yang jelas tentang kajian ini.

1.3 Kepentingan Kajian

Kajian ini diharapkan dapat memperkenalkan kepada umum tentang wujudnya bahasa Bugis yang merupakan salah satu bahasa minoriti yang terdapat di Malaysia di mana bahasa ini dituturkan oleh etnik Bugis. Ini adalah kerana pada zaman ini perlumbaan kepada penguasaan bahasa yang dominan dan bahasa yang bertaraf antara bangsa menjadikan kita alpa terhadap kewujudan bahasa-bahasa minoriti yang terdapat di Malaysia.

Di samping itu juga, bagi generasi muda kumpulan etnik Bugis ini diharapkan mengetahui wujudnya bahasa ibunda yang merupakan warisan daripada nenek moyang mereka. Melalui

kajian ini, kita akan melihat corak-corak pemilihan bahasa oleh komuniti Bugis dalam domain rumah, domain intra-komuniti dan domain pekerjaan.

Diharapkan juga adanya tindakan dari pihak-pihak tertentu untuk mempromosikan bahasa-bahasa minoriti di Malaysia supaya bahasa ini diketahui umum dan tidak lupus begitu sahaja.

1.4 Batasan Kajian

Kajian pemilihan bahasa di kalangan komuniti Bugis belum pernah dilakukan oleh mana-mana pengkaji di Malaysia sebelum ini. Ini merupakan kajian pertama mengenai pemilihan bahasa yang melibatkan etnik komuniti Bugis. Oleh itu, adalah sukar mendapatkan bahan-bahan rujukan yang berkaitan dan membuat perbandingan dengan kajian-kajian lepas. Walaupun begitu, terdapat kajian pemilihan, pengekalan dan pengalihan bahasa yang dijalankan ke atas kaum etnik minoriti yang lain seperti komuniti Jawa, komuniti Sindhi, komuniti Rajang-Tanjong, komuniti Portugis di Melaka dan komuniti Iyers yang boleh dijadikan rujukan.

Di samping itu, terdapat juga kajian-kajian lain yang dijalankan mengenai komuniti Bugis. Ianya melibatkan bidang-bidang seperti sosio-budaya, konsep siri' (malu), kajian etnografi, kajian fonologi, migrasi, pola dan sosio-ekonomi serta dialektologi bahasa Bugis.

Kajian ini hanya tertumpu kepada golongan etnik Bugis yang tinggal di Kg Parit Keroma, akan dirujuk sebagai (KPK), Pontian, Johor dan beberapa keluarga etnik Bugis yang berasal dari KPK yang telah menetap di Kuala Lumpur. Responden kajian di KPK adalah

berjumlah 100 orang sahaja iaitu daripada 22 keluarga etnik Bugis. Manakala hanya 20 orang sahaja responden etnik Bugis yang telah menetap di Kuala Lumpur iaitu terdiri daripada 6 keluarga.

1.5 Latar Belakang Kajian

Orang Bugis menurut Lineton (1974:6) berasal dari kepulauan Sulawesi atau Pulau Celebes di Indonesia dan jumlah penduduk mereka kini hampir tiga juta orang yang tinggal di kawasan selatan kepulauan Sulawesi. Namun begitu ramai dari mereka telah berhijrah ke kepulauan lain di Indonesia dan tempat-tempat lain di Asia Tenggara seperti Malaysia. Penghijrahan mereka adalah disebabkan beberapa faktor dan salah satu di antaranya ialah penjajahan Belanda di Indonesia. Orang Bugis dikatakan tidak mahu menyerah kepada pemerintahan Belanda dan mereka mula berhijrah meninggalkan tanah air mereka. Di samping itu juga mereka adalah terdiri dari pelayar-pelayar yang hebat dan ini telah memudahkan mereka berlayar untuk mencari penempatan baru. Rubin dalam Tamrin (2001: 6) telah menulis tentang perkara yang sama:

'The Dutch capture of Macassar in 1668 had the result of driving the adventurous Bugis traders out of their own land, where they were unwilling to submit to the Dutch monopoly regulation' Rubin (1974: 104)

Kesan dari penghijrahan ini, terdapat orang Bugis yang telah sampai ke Tanah Melayu pada masa itu dan memulakan penempatan mereka di negeri-negeri seperti Johor, Selangor dan Sabah.

Penghijrahan di kalangan komuniti Bugis adalah berbeza dari segi motifnya. Andi Zainal Abidin (1983: 58), mengatakan motif perantauan dari dahulu hingga kini adalah untuk

membaiki kehidupan kecuali pada kurun ke 10 hingga ke 15 yang sebahagian besarnya adalah disebabkan oleh permusuhan sesama mereka dan perebutan kuasa. Manakala pada akhir-akhir ini adalah lebih bermotifkan ekonomi.

Mengikut Mohd. Yusuf Md. Noor di dalam Noor Aina Dani (2006: 192), terdapat dua tahap migrasi orang Bugis dari tanah tumpah darah mereka di Pulau Sulawesi Selatan. Pertama, migrasi pada pertengahan kurun ke 16 akibat tekanan penjajah. Peristiwa ini berlaku selepas kemusnahan perdagangan rempah di Maluku yang pernah dikuasai oleh orang Belanda. Orang Bugis telah kehilangan punca pendapatan. Akhirnya mereka terpaksa berpindah ke Tanah Melayu iaitu Selangor dan Johor. Pada mulanya mereka hanya menjalankan aktiviti pertanian. Walaubagaimanapun segalanya berubah dengan kehadiran Bugis lima bersaudara iaitu Daeng Merewah, Daeng Celak, Daeng Parani, Daeng Menambun dan Daeng Kemasi. Sejak itu telah berlaku perubahan di dalam kedudukan kaum Bugis di mana mereka terlibat secara langsung di dalam sistem politik di Tanah Melayu, terutamanya di dalam sistem politik negeri Johor hingga mereka dilantik sebagai pemerintah Riau. Orang-orang Bugis seterusnya memperluaskan kuasa pemerintahan mereka ke negeri-negeri yang mempunyai bijih timah seperti Perak dan Selangor serta menubuhkan kerajaan sendiri di Selangor.

Migrasi kedua pula berlaku pada sekitar tahun lima puluhan akibat tekanan ekonomi yang memaksa mereka mencari nafkah di tempat yang lebih selamat. Ketika itu, Sulawesi turut mengalami kemiskinan dan gejala sosial yang serius. Pada masa yang sama juga, terdapat faktor tarikan dari Tanah Melayu seperti pembukaan tanah-tanah baru serta peluang pekerjaan yang lebih menjamin masa depan. Oleh sebab itu penghijrahan yang berlaku kali

kedua ini adalah lebih pesat. Sebagai contoh, bilangan komuniti Bugis dan Jawa pada tahun 1894 di negeri Johor dianggarkan 30 000 orang (Noor Aina , 2006: 193).

Sebagaimana yang telah diketahui, ciri orang-orang Bugis yang sentiasa berlumba-lumba untuk mengumpulkan kekayaan juga menyebabkan mereka sentiasa bergerak dan belayar ke merata tempat. Mereka suka bergerak atau merantau seterusnya mempunyai kecenderungan untuk berpindah ke tempat lain. Mereka bergerak ke serata tempat termasuklah ke Malaya (Malaysia), New Guinea Barat, selatan Filipina, utara Borneo dan kepulauan Sunda (Pelras, 1996:5). Penghijrahan orang-orang Bugis ini dapat dilihat dengan lebih jelas dalam peta berikut:

1.5.1 Peta Penghijrahan Orang-Orang Bugis Sekitar 1680-an.



Peta 1 : Tamrin (2001:16)

1.6 Bahasa Bugis

Bahasa Bugis adalah salah satu cabang dari bahasa Nusantara yang termasuk dalam rumpun Austronesia. Campbell (1991: 230) mengatakan bahawa bahasa Bugis adalah berasal dari keluarga Malayo-Polynesia iaitu salah satu cabang dari bahasa Austronesia. Oleh sebab itu bahasa Bugis mempunyai hubungan yang rapat dengan bahasa-bahasa yang datang dari bahagian barat gugusan kepulauan Melayu seperti bahasa Jawa, Sunda, dan Madura. Bahasa Bugis juga mempunyai hubungan dengan bahasa yang berasal dari timur gugusan kepulauan Melayu iaitu bahasa Melayu. Menurut Ibrahim Ahmad di dalam Noor Aina (2006:193), bahasa Bugis termasuk dalam rumpun Austonesia dan ini dibuktikan berdasarkan sifatnya yang sama dengan kebanyakan bahasa lain yang sekelompok dengannya.

Untuk membuktikan hubungan tersebut, Arbak Othman (1983:43) menunjukkan perbandingan berdasarkan perkataan beras seperti yang digambarkan dalam Jadual 1.1 di bawah:

Jadual 1.1 : Perbandingan Perkataan “beras” dalam Bahasa Serumpun

Melayu	Batak	Madura	Makasar	Bugis	Sunda
Beras	Boras	bereus	Berasa	Wara	Beas

Walaubagaimanapun perkataan beras yang digunakan oleh komuniti etnik Bugis di Kg. Pt. Keroma adalah “bere” bukan “wara”. Perkataan “wara” telah mengalami proses disimilasi iaitu penggantian konsonan “w” kepada “b” dan vokal “a” kepada “e” untuk memudahkan

sebutan. Perkataan “bere” juga adalah lebih hampir dengan perkataan “beras” jika dibandingkan dengan “wara”.

Bahasa Bugis di Sulawesi terbahagi kepada dialek-dialek dan sub-dialek. Menurut Rosman Bachok (1988:5), bahasa Bugis di Sulawesi Selatan ini terbahagi kepada beberapa dialek iaitu dialek Palakka atau Bone, dialek Wajo, dialek Soppeng, dialek Sidenreng atau Rappang, dialek Pare-pare, dialek Sawito atau Pinrang, dialek Camba dan dialek Luwuk. Namun begitu, menurut Hjh. Indok Jennek yang merupakan generasi pertama di KPK, Hj. Beduroding yang merupakan bekas Ketua Kampung KPK, Hj Arshad dan isterinya Hjh. Maharani yang merupakan warga tua di KPK , dialek yang digunakan oleh penduduk etnik Bugis di KPK ialah dialek Wajo.

1.6.1 Skrip atau Tulisan Bahasa Bugis


Tulisan Bugis dikenali sebagai Lontara atau Aksara Bugis. Menurut Moen di dalam Tamrin (2001:12), Lontara adalah tulisan kuno Bugis yang ditulis di atas sejenis daun palma kering di mana di atasnya huruf atau skrip ditulis dengan garisan-garisan tajam. Garisan-garisan yang terbentuk kemudiannya dibubuh dengan serbuk hitam sebagai dakwat untuk memberi warna kepada garisan tadi.

Menurut Nordin Bula aksara atau tulisan ini telah wujud sejak abad ke-12 lagi iaitu sewaktu berkembangnya pengaruh Hindu di Kepulauan Indonesia (<http://www.sabah.org.my/bm/daerah/daerah/twu/tawau/bugis.htm>).

Chacho Bulan pula dalam Tamrin (2001:13) bahasa Bugis adalah suatu bahasa yang unik kerana etnik Bugis mempunyai bahasa dan tulisan yang tersendiri yang tidak ditiru atau

diceduk dari mana-mana bahasa lain. Bagi Noor Aina Dani (2006: 194), bangsa Bugis adalah bangsa yang bertamadun kerana mempunyai tulisan yang tersendiri. Menurut beliau lagi, tulisan Bugis terdiri daripada 23 huruf dan ianya tidak seperti tulisan Jawi (Melayu) yang mencontohi bahasa Arab.

Berikut adalah contoh tulisan Bugis:



Rajah 1.1 : Tulisan Bugis

(<http://www.sabah.org.my/bm/daerah/daerah/twu/tawau/bugis.htm>).

1.7 Sejarah Bugis Di Tanah Melayu

Orang-orang Bugis telah datang ke Tanah Melayu dan terlibat dalam politik Tanah Melayu sejak abad ke 18 lagi. Sebagaimana menurut Tregonning di dalam Rosman (1988:2),

'The eighteenth century in Malayan history is the Bugis century. In Selangor, a Bugis became Sultan and in Johor they eventually obtained complete control'
(Tregonning 1964:2)

Menurut Tregonning lagi orang-orang Bugis telah terlibat di dalam satu percaturan yang berlanjutan yang telah meletakkan mereka di barisan hadapan dalam kegiatan politik alam Melayu.

Jessy (1970: 66), pula menyatakan bahawa sejarah Bugis di Tanah Melayu bermula sejak penaklukan negeri Johor oleh Raja Kechil dari Siak. Raja Kechil telah membuat helah untuk bekerjasama dengan Daeng Parani untuk menyerang Johor. Apabila Daeng Parani sedang bersiap-sedia mengumpulkan angkatan tenteranya di Selangor, Raja Kechil secara mengejut telah menyerang Johor secara sendiri seterusnya menakluki negeri itu. Anak raja Johor pada ketika itu yang melarikan diri ke negeri Pahang iaitu Raja Sulaiman telah meminta bantuan daripada Daeng Parani. Akhirnya, Raja Kechil dapat dikalahkan. Baginda ditabalkan sebagai Sultan Johor dengan gelaran Sultan Sulaiman Badrul Alam Shah (1721-1760). Sebagai mengenang jasa Daeng Parani dan memenuhi janji Raja Sulaiman, abang Daeng Parani iaitu Daeng Merewah telah dilantik menjadi Yamtuan Muda iaitu pada tahun 1722. Jawatan Yamtuan Muda bukan bakal Sultan dan boleh disandang oleh keturunan Bugis sahaja (Abdullah Zakaria 1999: 41). Yamtuan Muda adalah orang yang paling berkuasa dalam kerajaan Johor dan Sultan Sulaiman dikenali sebagai Raja Boneka sahaja. Bertitik-tolak dari sinilah pengaruh Bugis diperluaskan hingga ke Pahang, Selangor, Kedah dan Perak.

Di Selangor pula, Daeng Parani telah berkahwin dengan seorang Bugis yang kemudiannya menuntut gelaran Yamtuan Selangor. Manakala bagi masyarakat Minangkabau di Negeri Sembilan, Undang merupakan ketua masyarakat bagi kawasan Sungai Ujong yang diberi gelaran Bugis iaitu Dato' Kelana Putera kerana Undang pada masa itu mempunyai darah keturunan Bugis. Selepas itu, perkara yang sama berlaku di Linggi. Ini bermakna gelaran Bugis mula digunakan di kawasan orang-orang Minangkabau di Negeri Sembilan (Jessy, 1970).

Setelah orang-orang Bugis mengukuhkan kedudukan di selatan mereka kemudiannya bergerak ke utara pula. Di Kedah, lima bersaudara iaitu Daeng Parani dan empat saudaranya telah berjaya menabalkan putera sulung Sultan Kedah sebagai Sultan selepas membantu baginda memenangi perebutan kuasa dengan adinda bongsu baginda. Selepas itu Daeng Parani telah dikahwinkan dengan salah seorang kerabat diraja Kedah dan menetap di Kedah. Beliau telah membantu Sultan Kedah untuk berperang dengan adinda bongsu baginda yang mendapat bantuan daripada Raja Kechik. Perang saudara ini telah dimenangi oleh Sultan Kedah dengan bantuan orang-orang Bugis. Di negeri Perak pula, raja-raja Kedah dan pahlawan-pahlawan Minangkabau banyak memegang jawatan-jawatan penting dalam kerajaan dan ini telah menyebabkan kemarahan orang-orang Bugis. Apabila perang saudara meletus antara Sultan Perak dan adinda baginda Muzaffar Shah, Daeng Merewah telah menyebelahi Muzaffar Shah dalam perang tersebut dan berjaya memenanginya. Sultan Muzaffar Shah kemudiannya ditabalkan menjadi Sultan dengan gelaran Yang diPertuan (Jessy, 1970).

Secara keseluruhannya, pergolakan politik pada abad ke 18 menyebabkan orang-orang Bugis berjaya menguasai politik di Selangor, Johor, Kedah, Perak, Riau, Linggi dan kawasan Minangkabau yang sebelumnya di bawah pengaruh Raja Kechil dari Siak.

1.8 Penempatan Orang Bugis di Malaysia

Penghijrahan adalah merupakan satu sebab mengapa orang-orang Bugis boleh ditemui di pelbagai negara di kawasan Asia Tenggara. Sebagaimana menurut Millar di dalam Tamrin (2001: 19),

Migration is far from being a recent phenomenon for the Bugis. They have been known for centuries throughout the Indonesian Archipelago and the Malay Peninsula as traders, pirates and settlers. By the beginning of the twentieth century there were large settlements of Bugis on the east coast of the Malay Peninsula, on the eastern and southwestern coast of Borneo and elsewhere (Millar 1981: 18)

Perkara ini juga telah dijelaskan oleh Saidah (2000: 22), di mana sebelum orang-orang Bugis tiba ke Tanah Melayu pada kurun ke 17. Mereka cuba membuka penempatan di Sumbawa, Lombok dan Bali tetapi tekanan dari pihak berkuasa di sana telah menyebabkan mereka beralih ke kawasan lain seperti Tanah Melayu. Selain dari itu perang saudara yang berlarutan di selatan pulau Sulawesi serta tekanan dari pihak Belanda yang menyerang mereka dalam perebutan perdagangan rempah mengakibatkan mereka berhijrah pada akhir abad ke 17 dan telah tiba di persisiran pantai barat semenanjung Tanah Melayu iaitu seperti di kawasan jajahan Johor.

Penghijrahan juga telah membawa orang-orang Bugis berpindah ke Sabah, pada sekitar tahun 1950 an kerana permintaan tenaga buruh daripada pemerintah British untuk mengusahakan ladang-ladang getah yang mendatangkan hasil lumayan pada masa itu (Noor Aina 2006: 193). Seterusnya orang-orang Bugis sekali lagi berhijrah beramai-ramai pada tahun 1960 an dan 1970 an di Tawau, Sabah kerana mereka diperlukan untuk bekerja di ladang-ladang dan dalam industri pembalakan.

Apabila dilihat dari segi sejarah, komuniti Bugis telah berhijrah dari Sulawesi Selatan ke negeri Johor, Sabah serta negeri-negeri lain di Tanah Melayu untuk membuka penempatan baru serta membina penghidupan baru yang lebih baik. Jika dilihat pula dari segi sejarah pembabitan Bugis di dalam politik Melayu, ianya melibatkan negeri Johor, Selangor dan

Perak. Dengan itu, dapatlah dikatakan bahawa taburan komuniti Bugis di Malaysia adalah di Johor, Selangor, Perak, dan Sabah. Ini dijelaskan dengan kenyataan Hayatie Untong (1996: 2),

*Masyarakat Bugis merupakan salah satu kelompok imigran Indonesia yang telah masuk dan menjalani kehidupan dalam masyarakat Melayu. Mereka dengan mudah menjadi warganegara Malaysia seperti di **Johor, Selangor, Perak dan Sabah** kerana mereka beragama Islam dan mempunyai cara hidup yang sama dengan penduduk tempatan.*

1.9 Kegiatan Sosio-Ekonomi Orang Bugis

Komuniti Bugis di Sulawesi menjalankan kegiatan pertanian secara aktif. Di antara tanaman utama mereka adalah padi, jagung, pelbagai jenis ubi, kacang dan sayur-sayuran. Selain daripada itu mereka juga menanam tembakau, cengkeh, kelapa dan buah-buahan untuk tujuan perdagangan (Zulyani Hidayah 1997:64). Di samping melibatkan diri dalam bidang pertanian orang-orang Bugis juga menceburi bidang perdagangan. Ini dikatakan oleh Andaya di dalam Tamrin Amboala (2001: 3):

'Mereka (orang-orang Bugis) adalah saudagar-saudagar terbaik di kepulauan timur, nilai kargo mereka begitu tinggi menyebabkan ketibaan mereka sentiasa ditunggu-tunggu oleh semua kaum peniaga'

Menurut Tamrin (2001) orang-orang Bugis juga telah memonopoli kawasan bijih timah dan penanaman gambir di Tanah Melayu. Mereka mula melibatkan diri dalam aktiviti perlombongan bijih timah sedekad lebih awal sebelum orang-orang Cina membukanya secara besar-besaran pada abad ke 20.

Koentjaningrat di dalam Tamrin (2001:18) mengatakan, sikap dan perwatakan orang-orang Bugis menjelaskan penglibatan mereka dalam aktiviti perikanan dan perdagangan. Aktiviti ini telah membawa mereka belayar ke Sumatera, Tanah Melayu, Siam, Kepulauan Maluku dan Utara Australia.

Dari segi sejarah, etnik Bugis terlibat secara aktif dalam bidang ekonomi seperti dalam aktiviti pertanian, perlombongan bijih timah, perdagangan dan pelayaran. Menurut Encik Yusufa yang merupakan Ketua Kampung KPK, kegiatan sosio-ekonomi etnik Bugis di KPK adalah bertani dan hasil pertanian mereka adalah kelapa, kelapa sawit, nenas, dan pisang di mana melibatkan 70% dari jumlah penduduknya manakala 30% daripadanya bekerja sebagai kakitangan kerajaan dan swasta di sekitar bandar Pontian, Johor.

1.10 Politik

Pada zaman dahulu orang Bugis di Sulawesi pernah memiliki kerajaan yang kukuh. Menurut Nuryani Hidayah (1997:64), di antara kerajaan mereka adalah seperti Kesultanan Bone, Bugis-Luwuk dan Soppeng. Pada masa itu, masyarakat Bugis terbahagi kepada beberapa lapisan sosial, golongan kerabat diraja digelar **anakarung** (bangsawan), rakyat biasa digelar **tomaradika** dan golongan bawahan yang digelar **ata**. Golongan **ata** ini adalah dari tawanan perang atau pelanggar hukum adat.

La Galigo adalah epik yang terpanjang di dunia ditulis dalam bahasa Bugis lama. Ia merupakan legenda Bugis yang dikarang dalam bentuk puisi. Menurut **La Galilo**, kerajaan Bugis yang pertama ialah Wewang Nriwuk, Luwuk dan Tompokitikka. Luwuk mendapat kedudukan istimewa kerana ianya dianggap sebagai ketua Bugis. Walaubagaimanapun,

pada abad ke 15, berlakunya perubahan di dalam sosio-politik, ekonomi dan agama disebabkan berlakunya migrasi penduduk dari persisiran pantai hingga ke tengah hutan belantara dan membuka penempatan baru. Di dalam bidang ekonomi, penanaman padi sawah, pembuatan besi dan penggunaan kuda diperkenalkan. Dari segi agama, adat membakar mayat di sesetengah tempat mula diamalkan. Pada akhir abad ke 15, munculnya beberapa kerajaan baru menentang kerajaan Luwuk. Antaranya ialah Goa (Makassar), Bone dan Wajo'. Kematian Dewaraja, seorang raja Luwuk, menyebabkan perebutan dinasti untuk memerintah Tanah Bugis. Goa bersekutu dengan Bone menawan Luwuk dan sekaligus mempunyai pengaruh yang besar ke atas Sulawesi Selatan (<http://ms.wikipedia.org/wiki/Bugis>).

Pada pertengahan abad ke 16, Sulawesi Selatan dikuasai oleh Goa dan Bone. Oleh kerana kedua-dua negeri ingin meluaskan kuasa mereka, maka tercetuslah peperangan sesama mereka dan Bone dikalahkan. Sebagai membalas dendam, seorang putera Bone bernama Arung Palakka bersekutu dengan Belanda untuk menyerang Makassar. Pada tahun 1667, Makassar jatuh ke tangan Belanda dan ini menyebabkan migrasi Bugis ke Sumatera dan Tanah Melayu (<http://ms.wikipedia.org/wiki/Bugis>).

Faktor kemerosotan ekonomi juga menyebabkan mereka berhijrah ke Tanah Melayu. Sebagaimana menurut Noor Aina (2006: 193), orang-orang Bugis telah berhijrah ke Tanah Melayu untuk mendapatkan pekerjaan selepas kemusnahan perdagangan rempah di Maluku iaitu pada abad ke 16. Menurut Noor Aina lagi, kedatangan lima bersaudara Bugis iaitu Daeng Parani dan empat saudaranya telah menyebabkan perubahan kedudukan Bugis di Tanah Melayu kerana mereka terlibat di dalam percaturan politik pada masa itu dengan mengambil kesempatan dengan pergolakan yang sedia ada hinggalah terdirinya kesultanan Johor dan Selangor. Mereka juga telah menjawat jawatan penting seperti Daeng Merewah

sebagai Yamtuan Muda Johor dan Daeng Parani sebagai Yamtuan Selangor kerana usaha mereka membantu Sultan untuk mendapatkan kembali kerajaan mereka.

Kegiatan politik semasa atau terkini kaum minoriti Bugis di Malaysia boleh dilihat di peringkat kampung seperti di KPK yang mempunyai penduduk yang majoritinya dari etnik Bugis. Mereka biasanya akan melantik ketua kampung dari golongan etnik mereka. Sementara dalam kegiatan politik yang lebih tinggi di Malaysia etnik Bugis tidak mempunyai satu parti politik sendiri. Ini adalah disebabkan mereka menganggap diri mereka dalam bangsa Melayu dan dengan itu memadai bagi mereka untuk menyertai parti politik etnik Melayu dan dalam konteks di Malaysia ialah UMNO.

1.11 Agama

Pada asalnya masyarakat Bugis di Sulawesi mempercayai Tuhan yang digelar Dewa. Menurut Zulyani Hidayah (1997: 64), masyarakat Bugis di Sulawesi mempercayai dewa tertinggi iaitu yang dinamakan **Patoto 'e** (Dewa Yang Menentukan Nasib) atau **Dewata seuwa'e** (Dewa Yang Tunggal). Walaubagaimanapun Campell (1991: 230) mengatakan bahawa komuniti Bugis di Sulawesi pada asalnya beragama Buddha sebelum memeluk Islam. Komuniti Bugis dan Makassar telah meninggalkan kepercayaan asal mereka dan akhirnya memeluk Islam pada abad ke 16. Mereka diislamkan oleh Abdul Makmur, iaitu seorang Minangkabau pada abad ke 16 (<http://ms.wikipedia.org/wiki>). Menurut Pelras (1996:4), pada awal abad ke 17 orang-orang Bugis telah memeluk agama Islam bersama-sama orang-orang Aceh dan Minangkabau dari Sumatera, orang-orang Melayu dari Mindanao, orang-orang Banjar dari Borneo dan orang-orang Sunda dari Jawa Timur.

Setelah memeluk Islam orang-orang Bugis ini mempunyai identiti Islam yang kukuh dan Islam merupakan sebahagian dari budaya dan cara hidup mereka.

1.12 Adat dan Budaya

Amalan adat dan budaya yang diwarisi oleh etnik Bugis sejak zaman berzaman kebanyakannya sudah ditinggalkan dan diasimilasikan dengan budaya lain serta ditambah dengan permodenan. Ini ada dinyatakan oleh Wilson di dalam Hayatie Untong (1996:2),

Wahai umat Melayu, semuanya Tanah Semenanjung dan Kepulauan Indonesia, sama tanah pusaka datuk moyang kita orang Melayu. Nama Minangkabau, Bugis, Jawa, Brunei, Aceh, Lamapong, Palembang, Rawau, Kampar, Kelantan, Perak dan lain-lain itu bukannya nama bangsa ialah nama negeri. Bangsa tulen kita ialah Melayu.

Memetik kata-kata Ibrahim Yaacob di dalam Nurul Huda (2003:10),

Probably the largest group of Indonesian immigrants was the Minangkabau from Sumatera, the other major group are Bugis, Konichi, Rawa, Mandiling, Achehese and Batak. Since these immigrants were Moslems and were from a similiar cultural back ground, they could assimilate to the resident Malay population quite easily often through intermarriage Wilson (1967: 8)

Ini amat bertepatan jika dikatakan bahawa komuniti etnik Bugis adalah mudah untuk memasuki dan menjalani kehidupan orang Melayu atau “masuk Melayu” kerana di dalam Perlembagaan Malaysia Melayu ditakrifkan sebagai orang yang bertutur Bahasa Melayu, menganut agama Islam dan mengamalkan cara hidup Melayu (Asmah Omar 1988: 42).

Di antara adat atau budaya Bugis atau yang mempunyai pengaruh budaya asal Bugis yang masih diamalkan oleh komuniti etnik Bugis di KPK ialah adat perkahwinan dan adat naik buai bagi bayi yang baru dilahirkan. Orang-orang Bugis juga amat menggalakkan perkahwinan sesama etnik atau di kalangan saudara mara mereka. Ini adalah disebabkan mereka mahu mengekalkan budaya dan bahasa mereka. Di samping itu mereka juga mahu kekayaan yang mereka perolehi dapat dikekalkan di kalangan keluarga sahaja.

Konsep budaya dalam masyarakat Bugis adalah berteraskan tiga konsep utama. Menurut Rosmini Sumsudin (1999:2) orang Bugis atau To Ugi memegang tiga konsep dalam kehidupan mereka iaitu **pisse** – sikap setiakawan yang kukuh, **siri**’ – harga diri dan maruah diri serta **syara** – syariat Islam. Berdasarkan tiga konsep utama ini menjadikan masyarakat Bugis hidup bermuafakat, mempunyai jati diri yang kuat di samping menjalani kehidupan mengikut landasan Islam.

Setelah melihat dari segi sejarah, politik, sosio-ekonomi, agama dan budaya komuniti Bugis kini beralih pula kepada asal-usul KPK atau sejarah KPK yang mana sampel penduduknya menjadi fokus di dalam kajian ini.

1.13 Sejarah Kampung Parit Keroma Pontian Johor

Kampung Parit Keroma terletak di daerah Pontian dalam negeri Johor. Menurut cerita dari beberapa orang dari kampung ini seperti Ketua Kampung ini iaitu Encik Yusufa, bekas Ketua Kampung Tuan Haji Beduroding dan Imam kampung iaitu Tuan Haji Ismail orang pertama yang bertanggungjawab membuka perkampungan di kawasan Parit Keroma ialah seorang berketurunan Bugis yang bernama Daeng Madimeng Bin Daeng Patompok iaitu

pada tahun 1952. Beliau dikatakan telah berhijrah dari Tanah Ugi (Bugis) Sulawesi ke Tanah Melayu (Johor) dan telah membuka penempatan di Pontian, Johor setelah tiba dari Sulawesi.

Kampung ini dipercayai pada mulanya dinamakan sebagai Kampung Sungai Keroma berdasarkan kepada sebatang pokok kurma yang dijumpai di tepi sungai di kawasan perkampungan tersebut. Namun begitu pokok kurma tersebut mempunyai keganjilan iaitu ianya tidak pernah berbuah.

Pada tahun 1960 anak kepada Daeng Madimeng iaitu Daeng Mabela telah dilantik menjadi Ketua Kampung pertama kampung tersebut. Namun begitu nama kampung ini telah ditukar kepada Kampung Parit Keroma pada tahun 1962 bersempena dengan penubuhan Parti Kebangsaan Melayu Bersekutu atau UMNO pada 12 April 1962 dan ketua kampung pada masa itu ialah Tuan Haji Beduroding Bin Haji Sedekek. Beliau merupakan Ketua Kampung yang paling lama berkhidmat di kampung ini iaitu dari tahun 1962 hingga 2005. Jawatan beliau telah diambil alih oleh Encik Yusufa Bin Mustafa pada tahun tahun 2005.

Kampung Parit Keroma mempunyai keluasan lebih kurang empat kilometer persegi dan terletak dua puluh kilometer dari Bandar Pontian. Jumlah Penduduk kampung ini ialah hampir 300 ratus orang dan terdiri dari 80 keluarga. Majoriti penduduk kampung ini iaitu 95% adalah berketurunan Bugis dan 5% lagi adalah berketurunan Cina.

1.14 Kesimpulan

Komuniti Etnik Bugis di KPK adalah salah satu etnik minoriti yang tinggal di Malaysia di mana di dalamnya terdapat kepelbagaian bangsa dan budaya dan bahasa Melayu merupakan bahasa yang dominan. Oleh itu, kajian ini adalah untuk melihat pemilihan bahasa di kalangan komuniti Bugis di Kg.Parit Keroma yang asalnya dari kepulauan Sulawesi, Indonesia. Kajian ini adalah untuk melihat adakah berlakunya pemeliharaan dan pengalihan bahasa di kalangan mereka.

1.14.1 Peta Daerah –daerah di Johor

Berikut adalah peta negeri Johor iaitu terdiri dari 8 daerah dan Kampung Parit Keroma adalah terletak di daerah Pontian.




Peta 2: <http://johor.jkr.gov.my/2007/daerah.htm>

* Kg Parit Keroma terletak di Daerah Pontian

1.14.2 Mukim-Mukim di Daerah Pontian

Berikut adalah mukim-mukim yang terdapat di daerah Pontian, Johor dan Kg Parit Keroma adalah terletak di Mukim Ayer Baloi.



Peta 3: http://www.johordt.gov.my/mdp/sejarah_daerah_pontian.htm

* Kg Parit Keroma terletak di Mukim Ayer Baloi